



22 Maiu 2020

## Mensajen husi Embaixador Austrália nian iha Timor-Leste, Peter Roberts



Bemvindu mai iha ami nia buletin ba COVID-19 Edisaun dahaat nian. Durante semana rua ne'e nia laran iha ona atinjimenu ne'ebe signifikante tebes. Pasiente ba surtu COVID-19 nian nain hira mak alta ona – sira rekopera hotu ona – ho ida ne'e lori kaju ativu iha Timor-Leste ba zero.

Ita presta homenajen ba governu Timor-Leste, Ministériu Saúde (Palácio das Cinzas), Sentru Integrdu Jestaun Krize, pesoál liña frente sira ne'ebe mak ho dedikasaun serbisu lahatene kole hodi mantein kumunidade ne'ebe seguru no Timor-Leste nia parseiru sira inklui Organisaun Saúde Mundial Timor-Leste. Ami mos presta homenajen espesial ba povu Timor-Leste mak fó atensaun ba konselamentu kona-ba saúde públiku nian no foti medida hodi hamenus infesaun ne'e nia da'et, barak liu ho konxiénsia rasik.

Maibé, ita hotu hatene katak sei iha dalan ne'e be naruk atu atinje. Tuir saida mak ita haree husi esperiénsia internasionál, la fasil atu halakon virus ida ne'e. Ita tenke toma atensaun nafatin ba prevensaun no mós ba iha ita nia preparasaun. Austrália sei kontinua atu serbisu metin nafatin ho Timor-Leste. Ne'e mak sumariu principal husi atividade aktual sira.

### Iha semana rua kotuk liu ba, Austrália:

- 01 Entrega tan ona ekipamentu protesaun pesoál (PPE) no ekipamentu médiku nian inklui regulador ba oksijénia no instrumentu responde báziku nian. Ekipamentu importante hirak ne'e sei fó apoia ba atendimentu pasiente sira, nune'e mós garante seguransa ba pesoál hirak ne'ebé mak serbisu iha liña frente.
- 02 Tulun Timor-Leste atu habelar tan teste COVID-19 nian. Parabéns ba pesoál hirak ne'ebé mak serbisu makaas iha Laboratóriu Nasionál Saúde no sira nia parseria ho Menzies School of Health Research ne'ebé mak daudaun ne'e hamutuk ho Laboratóriu bele prosesa teste COVID-19 to'o 100 kada loron. Sei kontinua kolabora ho Ospital Royal Darwin.
- 03 Fornese ona máskara hena nian ba pesoál esensial sira. Austrália nia Polisia Federal fornese ona máskara oin nian ba PNTL nia médiku clinic atu nune'e ofisial polisia sira bele uza durante hala'o patrulla iha fronteira. Embaixada mós fornese ona máskara hanesan ba Asosiasaun Jornalista Timor-Leste (AJTL).
- 04 Maintein nafatin apoia ba Sentru Integradu Jestaun Krize ba planeamentu kontijénsia, hala'o monitorizasaun ba situasaun no mos relatóriu. Austrália nia asesor sira ba Programa Kooperasaun Defeza serbisu iha sentru refereee lorloron hodi fó apoio respode ba COVID-19.
- 05 Apresenta livro nota foun ho informasaun kona ba serbisu apoio hodi kontra violensia bajeia ba jeneru ba PNTL, hodi apoio polisia sira kona ba oin sa referee inan no oan sira ne'ebe presija ajuda. Liu husi rekoñese impaktu husi COVID-19 no responde emerjénsia ba iha asuntu jeneru, Programa Dezenvolvimentu Polisia Timor-Leste (sigla Inglés: TLPDP) tulun atu membru kumunidade sira ne'ebé mak vulneravel seguru nafatin.





06

Kompleta monta fatin ba fase-liman nian iha estasaun tolu-nulu (30) iha munisípiu sanulu (10) liu husi Austrália nia programa PARTISIPA, parseria ho Ministériu Obras Públiku. Sei monta tan tanke fase liman nian hamutuk 40 iha semana hirak oin mai hodi asegura ema hotu bele fase sira nia liman iha fatin públiku.

07

Mantein nafatin relasaun di'ak iha nivel senior hodi nune'e bele asegura katak ami nia asisténsia hirak ne'e tuir matadalan no mós hatan ba Timor-Leste nia prioridade sira. Semana kotuk, Ministra Defeza Linda Reynolds ho Ministru Defeza Brigadeiru Jenerál (ret) Filomeno da Paixão de Jesus hala'o diskusaun ne'ebé mak mahon tebes liu hosi telefone. DFAT mós hala'o diskusaun regular ho Timor-Leste nia Embaixadora Inês Almeida iha Canberra.

Iha loron Kuarta semana ne'e ita selebra tiha ona aniversáriu ba Timor-Leste nia Restaurasaun ba Independénsia. Mezmu nune'e ita laabele marka loron ne'e ho selebrasaun ne'ebé mak babain ita halo, ami presta homenajen ba Timor-Leste nia dezenvolvimentu no hamutuk ho Timor-Leste iha komemorasaun ida ne'e.



Iha loron 17 May Embaixada fó nia rekoñesimentu ba Loron Mundiál Kontra Homofóbia, Bifóbia, Interseksizmu no Transfóbia. Ita selebra domin no ksolok iha diversidade nia laran no buka dalan di'ak hodi promove simu-malu no respeita malu la haree ba orientasaun seksuál no mós identidade jéneru.

A Rua Mártires da Patria, Dili, Timor-Leste

E [austemb\\_dili@dfat.gov.au](mailto:austemb_dili@dfat.gov.au) | P (670) 3322 111 | F (670) 332 2247

 @AustralianEmbassyTimorLeste  Peter Roberts @AusAmbDili



Australian Embassy  
Timor-Leste

